

Dodgin, duckin, divin.

Discretion, as the old saying goes, is definitely the better part of valour.

Dodgin, duckin, divin,
The best wey o survivin.
No for me the square-set jaw,
The ramrod back against the wa;
I'm no inclined that wey ataw,
I'm dodgin, duckin, divin.

Dodgin, duckin, divin,
Tae hell wi strife an strivin!
I'd never land that killer blow,
The yin that flettens every foe;
For noo, I'll juist go wi the flow.
I'm dodgin, duckin, divin.

Dodgin, duckin, divin,
When problems start arrivin
It's "Shooders back, puff oot yer chest,
An best fit forrit, dae yer best!"
Away an jump! I'm no impressed.
I'm dodgin, duckin, divin.

Dodgin, duckin, divin;
Great days tae be alive in!
While freends supply their inner needs
By chairgin brick was wi their heids,
Or gamely facin doon stampedes,
I'm dodgin, duckin, divin.

Dodgin, duckin, divin,
There's some folk keep derivin
Perverse delight fae getting whacked,
Their erses skelped, their pusses smacked;
But as for me, when I'm attacked
I'm dodgin, duckin, divin.

Dodgin, duckin, divin,
There's nae pint in deprivin
A fule o what he wants tae be,
Sae, "Up an at 'em! Do or dee!
An be a hero." But see me?
I'm dodgin, duckin, divin.